

四庫全書

集部

欽定四庫全書

秋澗集卷二十七

元 王暉 撰

七言絕句

過文貞宋公墓

廣州去闕幾千里中使銜恩信貴僚莫訝簡驩無一語  
太平勲業見風標

沙丘宮

齊梁霸趙何雄壯探轂因鋒遽懦庸千古興亡酷相似  
武靈而後有莊宗

栢鄉道中

聯鑣時喜笑談開不覺淒風漲面埃曉日栢亭橋畔路  
青山一道柳邊來

大都小雪時聞兩廣捷至

雪翻廣陌飄梅粉雲覆宮牆抹竹烟預為新年傳喜慶  
捷書一夜到甘泉

宮杖亡宋物也左丞姚公以上所賜出示座客

故有此作

效王建體

六宮催上木蘭舟  
百色輸來不敢留  
親見紫宸新製杖  
金盤龍地玉虬頭

過中山府

紅旗鐵馬響春冰  
儒將清邊世莫驚  
遼吏不知溘泊險  
使來先問二蘇名

過梁門

漠漠蒼溟海氣霾銅梁此照遂城開不知坡漲能遮甚  
萬騎藪淵索戰來

毳幕卓歇圖

牙旗風軟馬蕭蕭渭水歸來氣更豪想得龍沙西北道  
際天秋草黑山高

題花光墨梅二絕

蜀僧超然字仲仁居衡陽花光山避靖康亂徙江南  
之柯山與參政陳簡齋並舍而居山谷所謂研墨作

梅超凡入聖法當冠四海而名後世嘗有移船來近  
花光住寫盡南枝與北枝之句其丰度可想見矣趙  
雲夢題云如王謝子弟倒冠落佩舉止欹傾自有一  
種風味蓋前朝高丞相家物暗香疎影溪雪春風四  
圖今失其溪雪見為宋漢臣所收僧號花光道人山  
谷少游皆贈以詩者

滿溪明月影扶疎只在縑塵照雪膚展放畫圖還記得  
孤山籬落漲西湖

破墨能開雪裏芳道人花供老猶香移船要近花光住  
笑殺涪公有底忙

裕卿李兄來別復效樂天體以贈

晤語從游喜任真玉堂僧舍幾相親河梁莫厭重攜手  
明日共為千里人

題朱彥暉三陪手卷

謂木菴陪飯賓漢卿陪針  
陳學士陪口也陳名時可

字秀甫

余年五十覺籠東左臂偏枯右耳聾說道燕城陪手客

此針傳授到朱公

江村訪友圖

江東宰相說風流  
賈嗣吳潛果孰優  
今日國亡公道出  
時須來訂晉陽秋

廉公竹牧古無雙  
聞道旌招別楚邦  
何計挽留陪老我  
似來謀及鹿門龐

兩椽茅屋枕江濱  
杖屨來敲月下門  
不是愛梅多看竹  
冷香疎影坐黃昏



韓幹畫照夜白圖

開元天子燕遊多一骨承恩玉色瑳所養自來非所用  
雨中蜀棧要青驪

纓紱騶衣一色紅玉華光照苑門空昭陵六駿秋風裏  
辛苦文皇百戰功

沉香亭下牡丹芳宮漏穿花夜未央輦路傳呼停鳳燭

內家歸詫玉麟光

松窓雜錄云開元中明皇嘗乘照夜白與楊太真賞牡丹于沉香亭

政捐金鑑九齡歸聲色糊塗醉不知天意種深天寶禍

故生尤物配妖姬

題何侍御所藏雪霽江行圖

雪霽澄江照眼開  
常年十月蔽兵埃  
而今風物真堪畫  
袞袞行商兩浙來

栢臺霜信肅江楓  
寒入黃茅瘴已空  
一線暮江春雪外  
枉將新意詫清雄

炎瘴清殘一雪餘  
勾吳無地不亨衢  
江山正要燕公筆  
却點騾綱入畫圖

滕王蛺蝶圖 劉侍御家藏

兩翅輕翾暈粉金  
內人無計撲羅襟  
南昌閣底花如霧  
迷殺春香一寸心

槐壤紛紛事暫歡  
枕中栩栩伴周閒  
丹青欲識滕王意  
須著人間此夢間

粉香金翠夢能甜  
細寫春牋入筆尖  
却恐尋香飛便去

六宮爭下水晶簾

王建宮詞有傳得  
滕王蛺蝶圖之句

夏日玉堂即事

悠悠時事百年心歲月徒成昨與今萬一寸長能及物  
不愁華髮已盈簪

失時已抱周人恨濟物常深永叔懷鈴索不鳴朝日靜  
坐看簾影轉苔堦

世願登瀛不作卿玉堂更比憲臺清只緣白獸樽中醴  
當日元王為穆生

陰陰槐幄羃閒庭靜似藍田縣事廳細草近緣春雨過  
映堦侵戶一時青

日長上直玉堂廬思入閒雲待卷舒重為盛時難再遇  
等閒羞老蠹書魚

故開府儀同三司中書左丞相贈太尉諡忠武

史公挽詞

并序

維大元國至元十二年歲乙亥二月七日中書左丞  
相忠武史公以疾薨于位訃聞天下痛悼嘆哲人之  
云亡哀斯民之無祿在某又有感焉而不能已者初  
壬子歲公受封于衛其年秋來視師某以諸生啓事

上謁特勝焉錄用實資藉之俾進其所未至以需時  
用逮中統建號之明歲公入當鈞軸時某掌記中堂  
館門下者半歲首奏擢為翰林修撰兼內省都司既  
而以事註誤得公辨明免歸至元改元總尹都督移  
鎮東魯辟某充幕官遵公命也公之意蓋欲革舊事  
行新用也九年壬申由御史得調平陽謁公授睽去  
曰若綿力頗久同列貴和餘復何云明年朝議經制  
南伐詔公開府襄州節制諸軍又將以僚屬召尋興

疾北還事雖不果於菲薄實加重嗚呼昔韓愈從事  
汴州於隴西公有惓惓不忘者在悲中令為可知不  
肖某何敢望昌黎之清光而忠武勲德為世宗臣遠  
邁中令而某也始終沐公裁成卯翼使聲光燭耀於  
時其感戴當何如哉一旦遡大樹之悲風痛吾儕之  
安仰此李平廖立淚下而沾襟者也爰賡薤露之歌  
用表素旂之末前十章頌公德業之萬一後五章攄  
平昔顧遇辱知之厚傳武侯於近代敢躡蹤張栻之

知贊充國於麟臺庶張本揚雄之作尚冀神靈鑒茲  
誠悃其詞曰

補袞功深作帝箴片言能沛萬方霖白頭無地酬知己  
重為蒼生淚滿襟

寇鄧高勲上將材丹青圖畫冠雲臺舉頭納納乾坤大  
辛苦中原百戰來

南臨江漢北無垠英衛軍機祐預仁百代盛從青史見  
漢家羣后有元臣



遺表陳情不及私南征無嗜殺為嬉身雖不覩吳平後  
羊祜恩威有素規

元勲高在麒麟上曠度初無智勇名欲見令公陰德厚  
一門八子總公卿

幾年黃閣見調元福浸蒼生奠枕安兩號改元幾二紀  
不教波及海南天

閭節堂堂五路尊繼承諸姪動天關推恩不為夷齊讓  
要慰先臣地下魂

身後論功誓不磨德鑄高冢鬱栽差千年零落丘山底  
忍聽唐鏡作露歌

上計歸來愈謹忠又從潛邸識真龍十年浴鳳池邊夢  
不到歌鐘甲第雄

逆齊節志竊桓文鯨鬣翻波海氣昏堂上有兵能制勝

一言料死莖中豚

時予都司中堂公聞逆璫突入濟南有稀入圈無能為之句至成擒竟如

料所

先皇登極公封衛賞識初緣啓事陳二十年間門下客

愧無椽筆贊經綸

昂藏綠野堂前鶴飲啄當年在鳳池一諾見推連省署

九泉埋骨荷深知

中統二年余在上都公館日陪侍左右

幕圍火烈燕巢傾此際誰能託死生一語保全微命去  
聖安方丈記辭行

拂衣歸去老田園木屑筠頭苦見憐尺一起為蓮幕客  
東平門下又三年

征南開府控襄州舒也何為預唱籌報德愧無千字誅

峴山南望淚空流

萬壽節同宋太常出左掖門口號

禁漏穿花夜已央  
宮槐籠曉色蒼蒼  
慙慙一點東華日  
先到紅鸞扇影光

隔夜端門分板位  
平明簪笏列鵷行  
紫雲低覆千官拜  
潤入金爐百和香

羯鼓聲高吹管清  
九天合作鳳鸞鳴  
侍儀贊唱三成後  
磬折齊呼萬壽聲

花映巖廊近紫宸宮官行酒過三巡共攜滿袖香烟出  
散作都城十日春

對品班分玉筍行一時望拜殿西廂百官燕出宮闈靜  
疎雨濛濛溼建章

過王太師廟

在壽張縣西三十里

老雨莓苔滿露臺野棠花映廟門開地中鐵戟消沉盡  
時有陰風樹杪來

題開州驛亭壁

并序

昔有宋之三葉也遼人大舉入寇南抵澶淵有併吞  
席卷之勢堯叟以蜀產主議西巡欽若以吳人請狩  
建業社稷安危在此一舉萊公審勢明料敵果挺不  
拔之忠任授瓊之責奮不顧身竟夷國難當時遼舉  
國之兵膽已墮公北狩一言奚待斃延壽一矢之力  
也庚申秋予應辟東魯道出是邦按轡周覽想河流  
之奔洶仰壁壘之雄峻斯亦宋之金湯也遂盤礴回  
鑿碑下慨然有懷古人臨大節處大難胷中素有所

定不然淮陰以漢中畧對烏得還定三秦武侯以南陽一論遽能西取劉璋東向以爭天下者哉

幸蜀巡吳避銳鋒竟從孤注助天功千年草木餘威在野老猶能說寇公

顯宗畫三教晤言圖

兩晉玄風倡永嘉晤言新意出承華後人莫作無同論  
剖破藩籬即大家

微言初不出吾書正恐雄誇涉誕虛座上若拈花葉間

發端當自仲尼居

承華宸翰日重光大定聲明有父皇若以撫軍監國論  
長沙書疏未容忘

緇衣蔽路樂清修羽客談玄日自由眼孔似憐吾輩小  
終年平地看錢流

謂儒戶印造寶鈔

鬢絲禪榻喜相依休問珠英果是非已看孔林殘照裏  
青衿漸染變緇衣

徽宗臨張萱宮騎圖



缺勝頰衫玉帶圍駿華翻影下瑤池老徽筆底無留思  
貌盡春風出閣儀

碧暈紅裁思有餘較來經國太工夫大風歌裏雲飛遠  
不畏高皇笑煞渠

戊寅歲燕都元夕

萬家簫鼓憶升平九陌銀華璧月澄此夕薊門南北望  
風簷隨分兩三燈

九齡忠諫圖

挺笏摧姦論已萌帝心唯恐悞忠貞開元所事呈來足  
只欠成都萬里行

樂士宣鷄鵲圖

宣和畫工

彩羽暈明照影閒蓼汀沙暖睡初殘驚揚寄謝霜空鵲  
輪與江湖百頃寬

四皓圖

山中日月到華胥澗飲芝餐樂自殊苦被留侯容不得  
須教人彘事相污

送南冠徐子懌兵後還武昌

臥老廬龍塞下春故鄉心緒異鄉身燈前一展平安報  
照眼清江月近人

故里依稀竹樹烟白頭此日是歸年多應秉燭東湖夜  
夢裏相看一泫然

王摩詰驪山宮圖

安遠門西萬里餘耕桑烟火總民居只因勤政樓中夢  
百倍華清樂不如

憶昔風流王右相  
開元親侍玉堂廬  
細吟凝碧池頭句  
政恐丹青是諫書

跋張龍丘簪花圖

醉吟賞盡洛陽春  
老與坡仙作近隣  
未礙一枝長在眼  
靜菴方寸本無塵

龍丘子晚居黃岡號靜菴居士與東坡為隣

荆氏周急圖

九縣飈馳到杞天  
禾廬櫛比豈容全  
指困能繼前賢舉  
亦是君家識事權

宣和梅蘭圖

暈碧裁紅奪化權  
冰姿芳魄鬪春妍  
只因五柞宮中夢  
不到幽香淡影邊

木有寒梅草有蘭  
色香宜作一圖看  
曾憂荆杞生庭戶  
歲暮芟夷有至難

題張寶臣手卷

華裾織翠萬金身  
名動春坊劔字新  
全是當年天策府  
經綸王業半儒臣

跋船子和尚圖

戢戢波間萬鱗遊一鈎那得盡回頭何如收却綸竿坐  
明月千江任自由

漁樵閒話圖

艤舟弛擔兩欣然千古興亡話眼前忘却前溪歸路晚  
暝烟橫合碧山巔

觀稼

朝餐不再腹為虛多稼雲連仰雨濡今日東城看佳色

預知糞壤是金珠

今年薪桂米量珠日聽閭閻有殍夫縱使積金高北斗  
不知能濟此饑無

烟鋪雲委泛晴光平遠風來粒米香鄒孟最深王道本  
徑從五畝論耕桑

雨後看山

西山盡日塵土面一雨晚來膏沐容晴霽最堪圖畫處  
白雲零亂點高峯

竹林七賢圖

森森烟玉太行秋  
七子徜徉結勝遊  
笑殺阿戎真俗物  
出山能幾執牙籌

魏晉清談倡若徒  
永嘉東播洛為墟  
大書不削陽秋筆  
更著丹青詫隱居

讀文中子傳

書成復性纔稱訓  
道見原人本自文  
聖學操存原不易  
白溪猶有淺深分



山壑萬松圖

髯龍落落不凡材萬壑蒼烟鬱未開絕似澗阿幽隱士  
苦嫌塵土不歸來

巖風謾謾泛秋聲展放橫披眼便明酷似龍山山正北  
兩崖陰合記經行

大厦圯傾要棟梁萬材于此鬱蒼蒼正須叮囑工師輩  
為楠為櫟細選量

構厦先論大匠賢宋楹櫟闌不相捐何當翦伐長材外

乞與坡仙作竈烟

讀開元天寶間事

庭燔錦繡初年事  
矯枉情過久復歸  
鄒孟一言垂至戒  
大臣無似格君非

常山不屈平生節  
中令能明死後忠  
未若廣平還具眼  
當朝終不賞邊功

李龍眠二駿圖

突齧相忘絡腦羈  
沙平春淨草萋迷  
後人莫作丹青看

特為南華釋馬蹄

遼夏尋盟靜塞塵  
駟歸逸華山雲當時駮牝三千匹  
辦與龍眠策畫勲

候廉相病

詩書素業清時樂  
草木平泉四季春  
議取相君無妄疾  
自來憂道不憂貧

金華恩眷見來深  
李泌初無富貴心  
琴裏南風如解慍

正煩吹起傅巖霖

一作況是岱雲能寸  
合肯教空作傅巖陰

當年匹馬走雷風，氣壓秦川百二雄。  
今日露華欄檻底，秋絲爭吐看青蟲。

貧不能移貴不驕，丈夫到此是雄豪。  
何當慰滿蒼生望，臥看東山月影高。

明皇按樂圖

羽曲調音到克諧，宮中花柳四時開。  
五絃儘有南薰手，却喚花奴解穢來。

興慶宮池水殿深，帝心橫潰溺娃淫。  
讓皇友愛情何切

獨為君王辨八音

逸圖零落御前屏  
心醉華清按樂聲  
擊損碧梧緣底事  
促教秋雨劒關行

李伯時二馬圖

肉駿連錢汗血無絕足  
日與駑駘俱何當  
與馭虎將駢蹴  
踏逋孽閭東隅

承顏堂

舉世紛紛說奉承  
色窮愉婉古難能  
近因細讀蘇公傳

眷戀庭幃有足稱

太子府戊寅夏六月二十日千秋節同承旨姚  
公尚書許公行香口號

入朝已盡三嚴鼓禮佛重行繞殿香洞戶啓時宮燭迥  
五雲高處少微光

前星光彩日重暉幼海風烟動羽旗曲暝未終閒委佩

朶頤廊下看靈龜

將入宮夜夢一大龜飛舞余  
前明日祝壽畢遂得觀大龜

沉沉蘭殿寶香薰濟濟衣冠四皓賓識取元良無算壽

斂時多福錫生民

時奏停  
運司

題沁州杜敬夫醉經堂沁春秋時地名銅鞮即

文中子祖父故居銅川地

金沙霧散滿懷春總為從來味道醇酣適愈深心愈樂  
不任栢杓復何人

聖賢真味日陶然王氏遺書有正傳河上丈人如見問  
却還糟粕到銅川

飲食誰非飽即嬉至論真味幾人知六經奧旨醲于酒

不到沉酣總啜醪

李相師詩

并序

伏以簾垂坐卜蜀君平祿命雖高目擊道存袁客師  
人倫尤妙嵩巖處士李君術窺鬼眼鑑洞清霄馳聲  
於京華二十年閱人于市樓幾百輩多因勢解焚之  
說無虛高過喻之辭待詔公車屢承恩眷直氣曾驚  
於戶牖微言預兆於機祥為賦新詩先書小序

霧隱雲驤虎豹文眼中歷歷說承恩羨君風鑑何精切



魯博紅雲一笑溫

萬事心藏到隱微一言能發靜中機  
聖皇臨御思賢切識取新豐馬布衣

過仁宗陵

道出黑石渡同宣慰陳慶甫遊仁宗陵後宋人曾有  
詩云干戈銷弭歲年登邊將無功吏不能四十三年

那忍說暗垂雙淚過昭陵

見朱晦翁語錄

猗蘭被路栢圍城此日秋禾滿廢陵伊洛水南崧少後

丙年六月記來曾

題承顏堂卷

近讀程氏遺書論曾子耘瓜誤斬其根曾皙建大杖以擊其背曾子仆地不知人事良久而蘇欣然而進曰大人用力教參得無疾乎乃退援琴而歌使知體康孔子聞而怒曾子至孝如此亦有這些失處若是舜百事從父母只殺他不得又問申生待烹之事如何曰此只是恭也若舜須逃也前日題此卷詩意偶

與此合喜為錄附其後

小雅報勞天罔極南陔致養戒何深浚完井廩從多故  
一順能全是舜心

題理宗所題宮扇

拱手深宮四十年只將詩酒鬪清妍料應一片江湖夢  
不到謝玄淝水邊

跋嘉祐熙寧間李昭珙所受告身三通

愛樹懷賢自昔然眼中真宰見差肩因思近代文明最

無似嘉熙慶厯年

跋秦王擒竇建德圖

天命人心已有歸  
怒猊抗嶽欲何為  
自將五載飛揚舉  
辦作秦王破陣辭

王昭君出塞圖

絕色當年冠漢宮  
誰移尤物使和戎  
流連不重君王憇  
延壽丹青似有功

朔漠風沙異紫臺  
琵琶心事欲誰開  
人生正有新知樂

猶勝昭陽赤鳳來

讀趙飛燕傳

朱閣蒼廊向夜開  
富平騶騎欲誰猜  
微行笑殺張公子  
併引昭陽赤鳳來

題黠鼠賦後

鼠喻雄深過柳州  
竊時欺暴果誰尤  
惠卿未死舒王在  
悄悄孤懷為國憂

社鼠城狐固細微  
不勞區處動嫌疑  
何當論報堂堦下

免使區區若輩欺

豺豕磨牙到暴殘容身應媿豸為冠  
咄哉此輩何為者  
未用區區許面謾

黃荃蜂蝶圖

翅粉翻香卷鐵鬚  
亭亭花影小  
華胥黃生筆底留  
深思  
似與齊丘釋化書

鳳輦隨渠遠  
幸臨隔花望  
斷翠嬪心  
春風上下撲不得  
飛過畫欄情更深

題劉君用可菴手卷

忤物能全古未聞正須多可應時人保身猶落婁公後  
唾辱須防潔面噴

題樂天不能忘情圖

病來心事轉蹉跎身外猶嫌長物多況是春歸留不得  
侍兒無用感雙蛾

里陌鳴珂歲月深柳枝清唱伴長吟一朝並逐春風散  
却是維摩示病心

悲鳴絡馬莫回頭說似余情久倦遊滿眼清伊石樓月  
杖藜來往亦風流

龍門八節鑿來平千首新詩貯佛經只為暮年無可做  
又留公案入丹青

青衫憔悴老江州放逐歸來萬事休止有醉吟情未減  
又翻新樣柳枝愁

春風不到豸冠霜甚是溫柔與醉鄉展放畫圖還自笑

鬢絲先比樂天蒼

年四十二  
髮已上白



題醉仙圖

瑤池清讌世空聞想像仙桃物外春  
畫史恍從蓬島見丹青貌盡醉時真

等是高陽舊酒徒醉鄉真樂到華胥  
不然有口難言際同向春風倒一壺

何物諸人作怪顛眼花落井口流涎  
滔滔總是胡盧輩强著冠巾作散仙

公堂即事自箴

兩衙相並無尋丈一處煩囂一寂然間有事來還徇却  
俯慙於地仰慙天

門帖子

不期北里富薰天敢羨中朝日九遷喜見上旬壬子會  
大家豐足過今年

題杜氏近仁堂

青青庭草我何殊物體方苞戒薙除致養此心能類長

一軒和氣際堪興

一作一天生  
意見方輿

我欲斯仁仁即至主人此理久相安  
兩椽寓舍中堂後  
莫作王孫火竈看

心德由來萬善宗舉斯加彼即冲融  
不須苦向遺編泥  
收取平時濟物功

漢署郎曹實要津不移居養幾何人  
粹然一點慈祥氣  
辦與人間作好春

嫂趨井坎爭援手牛為轂鯨免釁鐘  
天理在人曾間斷  
多君操守便從容

顏子拳拳善服膺豈徒歸美重名稱寥寥此意千年後  
復禮名家見杜陵

博愛功多到靜深虛懷猶用近為箴煩君試閱金華事  
何限當機利益心

跋燕肅牧羊圖

行飲溪流喜降阿歸鞭影淡夕陽坡似將濺濺維千角  
辦作宣王考牧歌

平秩東臯事有餘荒烟平楚散林墟牧人例有繁多慶

蓑底秋江夢衆魚

題溫居士畫像

盛集賓筵每會逢  
笑談端有古人風  
如公耆舊今能幾  
又逐秋江月影空

太真丰采動并門  
處士流芳實裔孫  
今日坐看磐石上

老成雖遠典刑存

自稱晉溫  
太真之後

題魯人張仲和卿舒嘯亭手卷

蟻穴蜂衙起事機  
人心無路到清夷  
翛然笑煞東皇客

月白風清世不知

千山秋月照螺臺兩吻清風萬壑來吹作半空鸞鳳去  
和公原是不凡材

己卯清明日雜詩時巡按南京

東風吹淨鎖窓塵落盡桃花別有春一樹青梅芳色老  
小湖山畔翠蛾顰

早衙例向中時散宿酒禁持到日西步繞芳叢春不見  
閒情還與碧雲低

千門萬戶記經行瓦礫場中問舊名一片清光春夜月  
照人依舊十分明

吏散公堂日向西暮雲樓閣自高低呢喃何處飛來燕  
似為巢新快穩棲

雪妥紅翻點綴春桃花錦爛柳條新那知春事都無意  
燕子爭來強語頻

我近南來石濟津暖烟晴日欲烘春自從入得清明節  
連日春陰殢殺人

汴梁清明

連日風沙此日晴東君有意作清明  
垂鞭醉入宮城去一片傷心畫不成

寒食日過隆德宮

當年陸海駭珍藏此日繁華墮渺茫  
春草不隨人事換依然分翠入宮牆

題孫郎中孝友峯

小穿沙鬣到玲瓏底事題為孝友峯  
長著紫荆庭樹影



金入八  
卷二十七  
鞠哀天顯表冲容

館史開府第宅

石欄春靜雨留臺江漢堂深又獨來前日平泉門下客  
一花一草總興哀

宮牆

一片摧頽當道危風前竹色想依依偶逢白髮宮前叟  
指顧因渠得禁闥

秋澗集卷二十七

欽定四庫全書

集部  
秋澗集卷二十八

詳校官侍讀學士臣沈咸熙

侍讀臣孫球覆勘

總校官降調編修臣倉聖脉

校對官助教臣汪錫魁

謄錄監生臣朱鎮

欽定四庫全書

秋澗集卷二十八

元 王惲 撰

七言絕句

故宮遺石

華陽遺宮土花碧依然萬石如林立  
憔悴崩雲偃月姿  
留與都人作寒食

至元十二年誕賓前二日同賈漢卿遊上方光

教寺謁相上人不遇因賈往年留題五詩清新  
婉麗煩襟為灑然也亦留詩壁間仍用其韻為  
鑑堂一笑

紺碧亭亭午影涼同來共坐贊公床  
拖條拄杖誰家去偕問山僧有底忙

出處何心爨與涼適來真是兩繩床  
分司不作埋輪去虛抱垂崖揀火忙

古寺僧殘草木深寶香猶足散煩襟  
雪窓不到聞猿句

幽鳥還驚恨別心

謂漢卿明日北歸

萬事無端起六根  
蟻旋蜂鬪苦紛紛  
閒來莫厭僧窓話  
暝坐蒲團到日曛

花木禪房一徑幽  
生平奇勝愛窮搜  
入門便得清涼界  
信有人間六月秋

閒閒公至大五年為慈聖兩宮重修寺碑說寺蓋  
夷山之地唐令狐楚愛其奇勝曾居於此塔係唐  
新羅僧智照用海船運新羅琉璃壁所建紀之以詩

閒人愛作靜中忙  
細和新詩步繞廊  
老衲向人誇水異  
一甌春露雨花香

流杯池

九曲灣環碧玉圍  
錦香吹浪下龍池  
一觴修禊宮中舊  
正是梨花雪滿枝

太白捫月圖

詩中無敵飲中豪  
四海飄飄一錦袍  
千丈醉魂無處著  
青山磯上月輪高

閩次千秋山圖

五年官守晉州城  
伐石堙山日有程  
展放畫圖還憶得  
姑山黃葉正經行

李白醉吟圖

長庚風彩月爭輝  
力士旁無識子儀  
白壁莫嗟疑有玷  
夜郎風物要新詩

題蘭廣寧望海寺詩卷後

同年樂用之為錄二詩贈仁甫縣令

金到明昌事事新粹然一氣變斯文試吟望海樓中詠  
轉見飄飄思不羣

遠懷世契崇明德通述先猷極孝心舉世泯然哀俗裏  
兩家風誼見來深

紫陽觀雜詩和西溪嚴韻

袖裏丹砂照夜紅市人爭識漢壺公南都花木春猶好  
長在先生杖屨中

心安已契長年說通寂能開不二門我亦靜中存夜氣



此身之外欲何存

終日沉迷簿領中  
乘閒時過紫谿翁  
請師莫作功名看  
心似浮雲度太空

片言理到釋羣疑  
不待諸生入管窺  
收却藥籠無個事  
一簾春夢落花知

坐忘不戴遠遊冠  
是是非非了不干  
欲識紫陽存養力  
一簪玄髮頗浮丹

絪縕元氣化雖精  
起滅漚如一唾輕  
為問壇邊聽經鶴

人生何苦未忘情

余年齟齬出京師想像繁華夢覺時  
前日石壇揮麈處故宮真似黍離詩

昌黎一序了仙翁六絕西溪意匠雄  
從此夜窓虛白滿滌除玄覽見冲融

一壺天地市朝間施藥歸來靜掩關  
幽睡不知紅日晚青山誰似白雲閒

壤壤槐宮蟻戰空銅駝陌上幾秋風  
一身歸潔何難有

人重清時濟物功

宮井七絕

團團鴛鴦露盤秋玉潤砂紅湛碧流多向內家供頓後  
餘甘翻麝入茶甌

野粉侵淫暗漆花玉床零亂卧泥沙羸瓶敗繡初無擇  
波及都城十萬家

高梧陰幕掖庭西清比中冷甘比飴今日道旁塵穢滿  
秋娘憔悴渡江時

清時瑤殿引瓶金百尺還聞墜水音想得日長宮閣靜  
玉盤珍果看浮沉

金屑離離泛曉光瀛池通氣溼嬰香六龍不挽清波去  
忍給吹脣燕御床

事事宮庭到可珍我因懷古故來頻一泓雖在當時水  
終似上陽白髮人

行入空宮重歎嗟倚天金碧墮塵沙景陽留在胭脂井

似與都人入夢華

後三絕和  
西溪韻

武元直雪霽早行圖

謝宣  
慰

亂峰疊嶽玉峻嶒危棧何人趣早行似我姑山新道就

神居東嶠聽雞聲

予官平陽時開姑山道甫成  
夜雪大作試車下故云神居

雪擁天山六月寒冷雲西北是長安行人馬上揚鞭喜

猶勝南荒作熱官

侯敬甫四題同西溪賦

昊天報德詩人感號慕終身大舜心舉世靡然哀俗裏

一家追遠見來深

永思  
亭

怡怡和氣滿春臺天顯曾忘鞠子哀說似升堂興起客

功夫原自孝思來

友于堂

德積於身報自豐君家培植見深功友于堂下看珠樹

漸與三槐氣象同

種德堂

紛紛萬變一心微止水能澄見是非客去妙觀尤有得

滿簾春日靜朝暉

清心堂

跋唐申王畫馬圖

內府曾觀鐵筆驄又於此紙得真龍却疑決電奔虹異

不到少陵題品中

題劉平妻胡氏殺虎圖

獸猛其如義烈何揮刀峻絕魯陽戈  
哀哀哭絕東山婦恨入秋空淚謾多

重陽前三日同文季長畢茂先酌七賢祠下

滿眼青山落帽風七賢祠下一樽同  
雲煙顧盼來能幾白髮相看總老翁

蓮社圖

莫怪淵明從遠公鬢絲禪榻偶相同談空說有知多少  
都在龍眠意匠中

二教玄風盛永嘉後來諸子更紛拏淵明興在東籬菊  
獨泛秋香亦自佳

一誕相誇陷洛郊流傳江左到滔滔杖藜首見淵明傲  
畫裏龍眠意最高

贈唐縣李縣尹

按部次堯封教官石雲卿來訪因話縣東有前鄆尹



李君年六十四雖武人性喜學己卯夏自浙東歸載  
羣書滿家將遺之子孫以酬夙志吁可尚也余聞之  
喜而不寐明日元旦躍馬來觀出經史子集及未見  
書七鉅箱凡千有餘帙富覽間偶得是詩以贈傳謂  
十室之邑必有忠信者李君其人也君諱忠字彥德  
縣人為蔡國公將

關

來向王充閱異書

田間炬草照西東正是農家一歲豐不謂兩椽茅屋底  
白頭還得愛書翁

唐之農家然束草于刈穫田間  
視其所偃以卜秋成元旦日

庚辰歲唐縣元日

堯封今歲遇新年欲訪遺風已渺然願效老人三獻祝  
至元天子壽如天

吾皇仁聖邁唐虞寬大恩頒歲首書正擬乘風開濁浪  
忽隨疏網漏凡魚

宣和珍禽圖

紫烟阿閣鳳連巢  
瑤圃飛翔下絳霄  
踏散木犀花上露  
翠襟丹喙不勝嬌

和唐邑教官石雲卿見贈詩韻

自笑鉛刀效至剛  
夢中揮箠走羣狼  
東皇若假春風便  
放使諸山草木香

已卯除夜次唐邑夢登一城有數狼前行以尺箠揮之四散避走又見一

豹無首

前竄

完州道中

使符按部喜同分  
首自行唐入保垠  
誰著分公司王老子

杏花香裏過今春

是年同出巡按官韓君美  
梁韓二簪事大使王西溪

過蔡國公第宅

南衙路斷歸時貴  
東第堂空設總帷  
鉅室顯知神鬼瞰  
一簪顏巷未為悲

庚辰歲人日前一日書夢中所見

碧樹翻香滿洞春  
一聲長笛隔花聞  
似嫌燕語鶯吟碎  
暖噴宮音過夢雲

題木蘭廟

廟勝曰孝烈將軍在今完州城東北隅至元庚辰正月十日來謁土人稱昔木蘭戰此得功故廟有熙寧間知軍事河南錢景初題記并所刻樂府古辭

春風奏凱入明光不願曹郎歸故鄉今日西山見遺廟  
蕙蘭根異久猶香

迷離撲朔雜雌雄萬里持戈此建功因見漢家征戍重  
盡興問左尚秦風

登完州城樓州是古北平又曰永平即漢曲逆

縣地故城在今州東廿五里即高祖云余行天下見戶口夥繁獨此縣與洛陽爾故城西南有

大垠土俗相傳謂陳平墓

土人稱墓曰垠

漢家山東二百州當時繁夥此為尤朝來指顧城樓上  
斜日荒煙草樹稠

望郎山有懷郝陵州

太行鼇振東入海鼓鬣高撐霄漢間一自詩仙黃壤隔  
風雲空鎖碧峰間

張九元帥哀辭

并序

不肖與公既昧平生哀誄有述似涉無從然聞公幼  
登詩禮長識風雲雄畧英姿為時名將始徇江淮厥  
績已著及平二王雋功獨高壽年未遐天遽奪去故  
作是詩於以為國哀而寓天下之所共惜也辭曰

瘴海波澄戰血紅歸朝無幾病籠東異時惇史論書法  
當與將軍死事同

盛說將軍禮度寬訃聞中外不勝酸可能秋月臺前照

便作悲風易水寒

英姿颯爽戰酣來夢裏神交一噓開弓劍永隨秋草沒  
春風吹恨上金臺

一曲鐃歌變八哀扶桑宿霧若為開我雖不識將軍面  
苦聽輦聲惜將材

蔡國高勲上將壇九郎又領俊功還遽教零落蛟龍匣  
千丈神光失斗間

曲中有悞時為顧特見巴丘蘊藉姿不似九郎橫槊裏



笑驅風月入新詩

堂堂萬里常山陣首尾橫穿海道空凌屋未圖元帥像  
樂歌先奏二王功

前日長歌入漢關今年埋恨九重泉應憐一段江山秀  
再到人間又幾年

劍騎前頭揭認旗風飄笳鼓入雲悲眼中部曲渾依舊  
不似樓船入海時

標柱紀功超漢將臨江觀陣惜奇才更憐一片金陵月

冷送哀聲萬里來

風吹大樹日蕭蕭雄畧無由覩嫖姚  
暴骨莽如天似暗  
不容勲伐蓋東遼

風翻素縵天為慘柳拂朱旗露易乾  
雞水不供門客淚  
郎山空倚戟衣寒

水邊臺榭月邊樓虎逝彪亡共一丘  
羽扇冷隨秋月暗  
銘旗高颺竹煙愁

保下春夜

金臺池館錦屏圍煙柳風荷蕩碧漪景物縱疎猶可愛  
畫船春水放燈時

諺語新年百草靈燕遺襪襠多能就中兩地風光盛  
東府風鳶保下燈

題抱陽山張燕公讀書堂

在完州東北廿里

富貴功名恐等閒丈夫臨事節為難挺然不附姦臣請  
似覺功夫出北山

書龕高倚抱陽雲萬壑天葩發異芬莫訝相君潛伏久

東封西祀要鴻文

凌閣勲名煥日星  
豹藏於此貯精英  
江山萬古風雲筆  
未覺前賢畏後生

贈孤月老

明月靈臺到炯如  
清光元叱衆星殊  
豈知影落千山底  
以德看來永不孤

攜筇偶入賛公房  
照眼驪珠夜有光  
臨水起亭他日事

為渠題作墨君堂

謂觀蘇黃二公手  
簡真蹟者數幅

祝香保定文廟

泮宮絃誦育多才視作尋常事可哀羣吏近霑閭侃色  
正緣文廟講書來

遊張將軍山林

至元十七年二月朔同苟嘉甫尚文蔚遊保城東張  
將軍山林置酒松臺因話郝奉使朱家州事

亭圯臺傾老樹欹夕陽淡淡鳥飛遲一樽細話朱州事  
天道幽冥未易知

跋雪谷早行圖

壺口山深石徑開  
六花一夕浥浮埃  
披圖憶得經行事  
夜半盤車下嶺來

題武遂朱君挽章後

諱和字信之

簿領微勞到贊襄  
政圖真見此心良  
更將一片西湖水  
波及奎郎見不亡

吏業出身子公奎字君璋

新安道中

長陂極目麥青青  
總是當年鴈鷺汀  
二十四橋春水外

野人指示望鵝亭

官舍即事

餘醺燕雪柳垂絲  
簾映虛庭淑景移  
八尺風漪紫藤滑  
清和天氣未暄時

題節婦盧氏銘後

節婦墳臺博陸南  
九原不化是真心  
儼然一片松陰石  
只與西山共古今

祁陽道中

鶯啼花落已無春  
四月田家更可人  
雨後老農催種穀  
風前紅袖採桑頻

行人不為送春忙  
一雨千林草木香  
馬上綠陰三百里  
直看春種到祁陽

一春勸課歷郊墟  
路入祁陽氣轉愉  
夾道錦韉州太守  
隔林紅袖趙羅敷

題孝感聖姑廟壁

分司巡歷滯農官  
來禱靈壇為歲寒  
一炷寶煙神意暢



祥飈吹下鳳雲冠

仙去清溪事渺茫  
女工留在故園桑  
春風頻滿汀州綠  
吹作淩波步襪香

卒歲誰能不製衣  
為蠶來禱聖姑祠  
何當雲葉翻看處  
門外山桑綠滿枝

題董左丞墳林

大樹蕭蕭綠滿林  
蒼煙埋沒石麟深  
兔葵難道無情物  
猶學將軍捧日心

南海揚旂開百越北風漏網有奔鯢多應奪去忽忽歎  
斜日宮中聽鼓聲

董相墳林南董里九門東下橐城西千年孝繼忠傳業  
萬字豐碑看御題

明皇私語圖

人老逢秋百感催夜深私語自為媒祇知海嶽情緣在  
不道生離有馬嵬

盈盈一水隔雙星不似行雲侍錦屏歡樂幾時憂思集

碧梧秋雨待君聽

秋滿驪山有所思  
海棠紅盛鬢華滋  
細思夜半銀屏語  
總是三郎嫵媚辭

戲題堦前玉簪

露影幽香溼畫簾  
美人睡起未全忺  
只疑冷墜搔頭玉  
月暗雲階欲悞拈

題郭都水若思祖行實卷後  
公善推步算數隱

德君子也

邢臺

天元章會到玄機星厯推來一理齊襄國至今傳異事  
門前鵲水亦曾西

龍岡拱木秋風老燕處猶懷隱德尊皇極不窮身後數  
青雲今見起家孫

鎮陽新居

行馬門施擁豹幢德威端稱使君堂不應花影潭心月

昨夜分光照客床

一作綠永堂前月  
綠水海子園堂名

嵇侍中祠

在湯陰縣西  
門外二里

八王雲擾亂中華義士何辜掩戰沙懷惠懦庸猶晉祚  
爭教移鼎入牛家

侍中精爽有無間霜葉猶疑血點殷一節見危能授命  
陸機回視恐慙顏

沙河道中

昨夜清霜比雪寒凋殘羣木柳宜先朝來信馬沙河道  
一一風前翠影圓

西門豹祠

在豐樂鎮  
東南一里

秋澗集

古人辦事笑談中常愛西門禁暴功邂逅馬遷稱善史  
不應排比滑稽雄

光武廟

在柏鄉城北十八里寰宇記云其地名壇亭乃帝即位之地也

雲臺袍鎧鳳花紅一體君臣祭祀同前日洛都城外望  
野煙無地認南宮

銅柱大淵上將功雲臺英烈儘爭雄可能祇為椒房戚  
不在龍姿姚耿中

滏陽道中

累累遺塚覆園瓊半是高齋與魏陵千古是非同一盡  
篡攘終為路人憎

邯鄲呂仙翁祠

邸飯猶炊一枕回繁華能幾暗興衰仙翁祠下無窮客  
不道都從夢裏來

題杜郎中二子字說卷後

燕客儀容雲表鳳紹宗英秀掌中珠故家正有新詩句  
不到徐卿第二雛

于公慎獄起高門積德而昌見後昆正似紫峰遺澤遠  
青衫遠有讀書孫

題劉大用畫草蟲手卷

蠢動翾飛自一天眼中風露發清寒筆端正有坡仙樂  
莫作宣和藝本看

東坡墨戲出新意八詠復見河陽劉夢到草堂風露裏  
碧花籬落候蟲秋

格物先須論致知古人圖史發幽竒多君夢到周南國



繪出幽風七月詩

闕題

清風澄治畧無私  
蟻聚蜂喧任一時  
正要至誠相推與  
不須臨事涉多疑

宣和寶石圖

煙雲萬態煥金書  
染出湖光照座隅  
不道漢家規制久  
泰山磐石是基圖

嶽廟謝雪偶題

至元十六年  
十二月廿四

名堯觚爵動雲霞慘淡陰靈黑帝家恒岳所臨風雨好  
不須飛石示雄誇

野老題詩語最工表余精禱與神通爐煙散處雲生野  
祝板喧時雪滿空

偶得二絕寄府尹史子華

離離殘雪點山郊麥壠埋深不見苗春在草根泉脈底  
淡黃先到綠楊梢

人說中山有父風久從眉宇得冲融燈前近閱虞芮案

轉見公明簿領中

謂牧羊北  
議劉等事

曲陽道中

軟紅沙路柳條風  
雪擁陽陂見煦融  
細繞嘉山三面過  
唐河東北望堯封

癸未年二月九日雪

東皇且莫認來真  
開拆花封占好春  
一夜雪花深數寸  
肯教桃李露精神

幾日輕陰雨氣氤  
凍殘花柳望春溫  
不知一夜豐隆意

散作銀花藥麥根

去冬寒沍過常年節近春分尚凜然薦地雲開風日好  
暖於南國賣餠天

大都即事

一資半級到銖分往往超遷越等倫除日豈徒傷道念  
飢寒常有幾千人

薪如束桂米量珠二月中旬凍未蘇笑殺九遷金馬客  
半年僵卧聽除書

創行敢效木求魚例進難於上坂車會取一陽潛九地  
春來葭管氣舒徐

燕都萬壽宮有梅一株每歲移置甯中逮春仲  
方發藏今年得花滿枝雖冰姿的皜香色彷彿  
終強顏也戲題二絕以自況

仙家有術解藏春蠟蒂雖融凍尚皴若比百門山下見  
強顏還似聽除人

冰姿難倚暖回根人力封培氣始伸蓓蕾看來雖勉強

一枝猶冠漢宮春

即事

無著必須循體例有依便指是人材區區桃李栽培手  
恐負東風一例開

朝鐘暮鼓惜蹉跎有例臺除半歲過不是馬周無伎倆  
翻來覆去幾常何

都尉王晉卿畫著色山齋圖

坡仙寶墨妙通神都尉丹青要儼倫欲識淡粧濃抹意

髻鬟渾似鏡中人

半生翠繞與珠圍不謂槐根夢已非老去紛華心自得  
筆端時到野人扉

惠崇蘆雁圖

雪灘風竹映寒塘水宿雲飛未易雙不似鴛鴦沙渚暖  
翠紅相倚睡春江

小桃

小桃開拆淡臙脂不出初春未半時二月朔風吹石裂

依然憔悴簇枯枝

梅粉飄零柳未煙一枝春色獨當軒今年盼得紅苞拆  
風雪禁持第幾番

清明節近無旬日桃蕾含芳又幾朝今日簷前看春色  
一枝纔見褪紅椒

題日者詩卷

侯鯖熊掌味能甜舉世看來意欲兼不似君平安素履  
一鑪香燼靜垂簾



蔡琰歸漢圖

明妃光寵照龍沙  
枉說琵琶憶漢家  
去住兩難心最苦  
就中哀怨是胡笳

和劉仲修見示十一首

今歲餘寒過往年  
東風無奈雪花顛  
幾時不禁燕臺酒  
蹴踏陽春醉十千

野鶴昂藏本不羣  
剛同秋隼下翔雲  
近年轉覺謀生拙  
半仰公田半賣文

舊城行出入新都驛  
劄堅求更聽除馬上相逢還自笑  
背行今見兩茅廬

闕

多少開花不識名

侍列朝班不厭紛  
久疎鷓鴣入行分  
今年偕就袍簪笏  
喜向龍墀拜聖君

滿紙新詩說遠遷  
淮西依例住三年  
若從清議先才智  
恐不多時又着鞭

先聲光動駕臺春入手行司又一新長記髯兄先盼睩  
一官同作兩淮人

畫角霜稜兩劒寒瘴煙都上筆頭乾十年搏擊秋風裏  
蜀棧盤空不覺難

月旦評中見壯圖不應齊魯總真儒別來又嚼冰霜久  
健筆鋒銛似董狐

茆屋燈青語夜闌一杯長記浣離顏朔風半夜驅車去  
詩在寒雲石嶺關

東風剪剪送春寒  
望望田家惜雨乾  
無事在家貧亦好  
有心行道古來難

虎豹九關圖

九重關鍵錦斑圍  
蟻蝨微言詎可知  
首闢四門明四目  
定書深意見宣尼

春夜獨坐

閃閃寒缸照夜昏  
眼中時事不容論  
近來鼠輩欺人慣  
踏碎承塵似馬奔

夜來寒冷似深冬曉日空燒海色紅一樹梅花春院靜  
伴人憔悴倚東風

梁園節序不相饒正月初旬凍盡消長記東牆微雨後  
一枝紅艷杏花嬌

風物淒涼近禁煙敵寒無酒客衣穿楊花總道多才思  
撲亂春衫不當綿

細草根深綠自叢山桃含凍尚能紅垂楊可是寒欺得  
半為剗中半蠹蟲

鞭石圖

洋海求仙已渺茫  
又鞭羣石駕飛梁  
帝功不出仁和聖  
罔念原來便作狂

檀州門外觀隰河春水

西山諸水頗齟淪  
合入渾河不自存  
昨見春水纔泮處  
滿川都作渴流奔

二月廿八日端門街觀乘輿還宮

龍煙日暖紫氤氲  
春水回鑾萬馬奔  
纓杖遠揮清蹕後

漢儀光動御天門

麗日紅翻御路沙青山回抱漢宮斜  
吾皇遊豫諸侯度

縱使都人看

一作望

翠華

年年原廟薦駕鸞春水秋山例一過  
安得求時姚右相  
為開三面說湯羅

闕

導鸞旂遠玉輦高

闕

象駕雄賜異不

闕

鎮國寺觀迎佛

九曜趨降世聖尊象車香滿綺羅塵人傳此伎中宮製  
上下雙輪轉十人

漢成帝幸張禹第宅圖

王氏常朝久惡譁幸回天鑒絕萌芽恬然不主天人斷

長恨安昌負漢家

孔子曰政事惡譁而  
善肅出李石博物志

與叔謙太常論書

翩翩每愛太常書姿態還同靜女姝儘是淡粧宮閣樣  
豈知東抹與西塗



相過閒話味何長  
字字顏書入品量  
握手正當吾意處  
畫須圓勁體須方

近年書學果誰優  
說道寥休有悟頭  
意態偶從駢字得  
千金駿馬倚山丘

一段殘槍路偶逢  
開鑪便作鏤錙工  
君看王趙凌雲體  
來自浯溪慘淡中

鵬雲九萬平原筆  
墨望蘇黃甘下風  
誰謂南唐金剪手  
敢將田舍比顏公

篆隸中追三代古風雲重策二王功遺山不見斐旻帖  
枉著雲臺詫米雄

雲蛟家廟駭盤拏著作姿容隱畫沙後世若從書法論  
混淪磅礴是承家

將軍懷敵銳於虎舍豈能為必勝哉今日遺碑見雄筆  
英姿颭爽漢雲臺

天山飛將指裴旻書到吾顏迴不羣不為策勲

闕

陳

至今冠劍氣凌雲

朝序卑高倒屣冠寓書還等義方彈一絨遺草如蚯蚓  
千古狐狸照膽寒

檢校秋官祿食糒顏宗收養半煢鰥當時米秉無多惡  
李相因書重泰山

小楷東方出右軍丹青難寫是精神孔門弟子多材藝  
有若唯能肖聖人

次山歌頌漢文章書到磨崖日並光具眼鹿菴曾有語  
筆間元氣總三蒼

蘇寬截耳殷姑節詈賊天津是大兄斷壁幾行移關帖  
九泉相值歿猶生

雜詩

野人家具取宮中適用都輸瓦缶功君是荆岩瑚璉璞  
得來纔待費磨礪

較量暮四與朝三初不多爭讓愧慙戀戀不成丹闕夢  
紉南纔了又湖南

夢歸故國蒼茫外春老風沙慘淡中辛苦西臺臺下柏

不成還作柳花空

昨日清明塵障面今朝上巳却晴明  
老天氣候初無定  
敢倚虛名作實行

人家構室要併懽  
小木支撐易作功  
汝是連雲棟  
隆物得來纔費梓人工

萬壽宮芙蓉杏花

三粘瓊島露華醲  
迸出高枝見化工  
不著上林春色底  
粉香吹滿步虛空

金史四八  
卷二十八  
滿意春寒強自妍  
一枝無葉更瀟然  
莫誇百葉玲瓏巧  
輸與垂楊護斷煙

活色生香貯好春  
橫斜燈影似梅君  
多情唯有東牆宋  
夜夜幽窓夢彩雲

開簇生紅滿故枝  
今朝看處雪離披  
一春幾日風光好  
素影幽香只自知

徽宗畫周靈臺圖

靈沼臺高倚碧霄  
當時魚鳥被恩饒  
可能積德千年久

盛世看來僅四朝

徽廟初年布政優丹青揮灑想西周其如逞慾橫流後  
花石綱船墊九州

秋澗集卷二十八